

Di tres grupo di Formacion Social ta conclui prome fase di entrenamiento

ORANJESTAD – E di tres grupo di Formacion Social a termina su prome fase. E transicion aki a keda marca diamars merdia durante un encuentro cu lidernan di e grupo, participantenan y nan famia na Marinierskazerne na Savaneta. Presente tabata Prome Minister Mike Eman, kende a haci entrega di certificado y baret na dies hoben cu awor lo pasa pa e di dos fase di cuater luna. Bou direccion di Capitan Cedric Werleman, e hobennan a duna demostracion di ehercicionan siña durante nan entrenamiento militar. Tambe mayor y famianan por a observa un resumen di e ultimo cuater luna pa medio di un video.

Capitan Werleman kende ta encabesa e proyecto Sociale Vormings Team a duna un



impresion di e disciplina cu e hobennan ta hayando cu no ta uno facil. E separacion di nan ambiente di custumber, e structura nobo y loke ta ser spera di nan, ta un cambio hopi drastico y cu ta rekeri di hopi esfuerso pa por cumpli cun'e. Net prome cu e acto simbolico di tira e pechi abou pa ricibi e baret, Capitan Werleman expresa lo siguiente: "E baret ta representa e forza cu bo mes a hinca aden. E ta representa un siguiente etapa."

Despues, den compania di mayor y famia, a disfruta di un lunch caminda por a combersa cu e hobennan tocante nan experiencia den e programa di Formacion Social y kico nan ta planea pa futuro. Un mencion special pa bay pa e hoben participante Joshue

Dirksz, kende no a falta ni un dia di e prome fase, cu excepcion di un siman ora cu el a sufri accidente. Pa tal merito, el a ricibi un plakkaat.

Formacion Social ta un ley vigente desde October 2011 cu e obhetivo di recluta hobennan local entre 18 pa 24 aña cu no ta bayendo scol y no a logra un diploma ainda. E proyecto ta posibel danki na e sosten di Ministerio di Defensa di Hulanda cu ta pone e facilidad di Marinierskazerne disponibel, ademas di fondonan financiero pa e ehecucion di e entrenamiento hunto cu Gobierno di Aruba. Riba e combinacion di foto por mira e hobennan den accion como tambe despues cu nan a ricibi nan certificado concluyendo e prome fase di entrenamiento. □